

Inatsisartunut aalajangiiffigisassatut siunnersuut, Naalakkersuisut peqquneqassasut danskit naalakkersuisui attavigineqassasut Kunngearfiup Issittumut Periusissiaannik, maanna 2011-mit 2020-mut Issittumut Periusissiaasup taartissaata Naalakkersuisoq peqatigalugit Kunngearfiup Periusissiasaata ilusilersorneqarnissaa, suleqataanissaat piginneqataasutullu inissinnissaata qulakkeernissaa, taamaalilluni periusissiami qitiusuni kalaallit soqutigisaasa peqataatinneqarnissaat qulakkeerumallugu.

(Inatsisartuni ilaasortaq Aleqa Hammond, Nunatta Qitornai)

Akissuteqaat

(Ilinniartitaanermit, Kultureqarnermit, Ilageeqarnermit Nunanullu allanut Naalakkersuisoq)

Siullermeerneqarnera

Maanna periusissiaasoq piffissaliussaa naangajalermat 2018 ukiukut issittumi periusissiornissamik nutaamik suliaqarnissaq pillugu Danmarkimi Nunanut Allanut Ministeriaqarfimmit Naalakkersuisunut saaffiginnipput kissaatigalugu nutarterinissaq. Nutaamik periusissiamik suliaqartoqarnerani Naalakkersuisut peqataaniarlutik aalajangiuppaat.

Issittumi nutaamik periusissiornissamut atatillugu atorfilittanik suleqatigiissunik Kalaallit Nunaannit, Danmarkimit Savalimmiuniillu inuttaqartinneqartumik pilersitsisoqarpoq. Taassumap kingorna peqataasut periusissiap imarisaanik eqqartueqatigiinnertik aallartippaat. Periusissiamut siunnersuut naammassineqarpat Naalakkersuisunit aalajangiiffigineqassaaq. Ilaatigut Naalakkersuisunit aalangiunneqassaaq periusissiamut nutaamut peqataanissamut kissateqassanerlutik.

Kunngearfimmut periusissiasamut Naalakkersuisunit arlalinnik piumasaqaateqarpugut, ilaatigut periusissiami erseqqissarneqassasooq kalaallit innuttaasut tassaasut Kunngearfimmi issittumi innuttaasuusut. Oqaatsitigut ilaanngikkaluarluni paasineqassaaq Naalakkersuisut tassaasut kalaallinut innuttaasunut sinniisuusut, aamma issittumi suleqatigiinnermi. Taakku saniatigut Naalakkersuisut kissaatigaat Issittoq pillugu suliat, pingaartumik Issittumi Siunnersuisooqatigiit iluanni naalagaaffeqatigiit akornanni suleqatigiinneq pillugu, qulaani oqaatigineqartut tunngavigalugit tulluarneqassasooq.

Periusissiami nutaami tassani Naalakkersuisut kissaatigaat issittumi Kalaallit Nunaata sunniuteqarnera nukittorsarneqassasooq. Ilutigaluguttaaq issittumi innuttaasut, tassunga pingaartumik Kalaallit Nunaat ilanngullugu nunarsuarmioqatigiit suleqatigiinneranni aammalu Issittoq pillugu nunarsuarmioqatigiit aalajangiussineranni annertunerpaamik sunniuteqaqataatinneqassasooq. Taassuma ilaatigut kingunerissavaa Kalaallit Nunaata Danmarkillu akornanni pisinnaasat inissisimanerisa periusissiami allassimallutillu atorneqarnissaat.

Suliaqarnermi kalaallit peqataanerata Kunngearfimmi siunissami Issittoq pillugu suleqatigiinnermi sunniuteqarsinnaanermit Naalakkersuisut periarfississavaat. Tassuuna qulakkeersinnaavarput kalaallit soqutigisaat periusissiami ersersinnissaat. Periusissiaq suliarineqartussaq maanna siunissamilu suliaassani periusissiap pingaarutilittut inissisimanissaa Naalakkersuisunit isumaqarfigineqarpoq, tassani ilaatigut pinngortitaq, silaannaap pissusaa, avatangiisillu eqqarsaatigalugit.

Issittumut periusissiaq ataatsimoorussaq Issittumi Kunngearfiup ataatsimut toqqammaveqarnissaq qulakkiissavaa. Periusissiamik nutaamik suliaqarneq sulii aallartisarfimmi inissisimavoq.

Issittumi suleqatigiinnermi kalaallit sunniuteqarnissaat annertusarnissaa oqaatigineqareersutut Naalakkersuisunit ujtartorneqassaaq, Kalaallit Nunaatalu nunarsuarmioqatigiinni peqataanissaanut periarfissaa annertusarneqarnissaa ujtartussallugu.

Naalakkersuisut periusissiami taassumalu suliarinerani sapinngisamik annertunerpaamik ammasumik aammalu politikikkut suliami qanoq inissimasoqarneraq ilungersuutigissavaat. Taamaattumik Naalakkersuisut naqissuserusuppaat periusissiap nutaassap imaanut oqaaseqaatissanik eqqartuinissami ataatsimiititaliat attuumassusillit aqputigalugit (pingaartumik Nunanut Allanut Sillimaniarnermullu ataatsimiititaliaq) oqaluuserinninnissaq sulii kissaatigaat.

Periusissiamut siunnersuut naammassisaq taassumalu imarisai pillugit Nunanut Allanut Sillimaniarnermullu ataatsimiititaliaq aamma ilisimatitsissummik ingerlatsivigineqarumaarpoq.

Tunngaviusumik Naalakkersuisut siunnersuut isumaqatigaat. Kisianni Naalakkersuisut kissaatigaat issittumi periusissiamut nutaamut periusissiap imarisai Kalaallit Nunaata soqutigisaannut akerliuppatta peqataanninnissaq sulii periarfissaqarfiginissaa taamaammat Naalakkersuisut allannguutissatut siunnersuut una innersuussutigaat: ***Inatsisartunut aalajangiiffigisassatut siunnersuut, Naalakkersuisut Kunngearfiup Issittumut Periusissiaannik suliaqarnermi suleqataanerit ingerlatiinnassagaat, kiisalu Naalakkersuisut peqquneqassatut issittumi periusissiamut nutaamut periusissiap imarisai Kalaallit Nunaata soqutigisaannut akerliuppatta Naalakkersuisut peqataassanngitsut.***